

حمدیہ ہائیکو

پنجابی

صاحبزادہ محمد لطیف ساجد چشتی

چشتی کتب خانہ

ارشدمارکیٹ جھنگ بازار فیصل آباد

جملہ حقوق بحق ناشر محفوظ ہیں

کتاب داناں	حمدیہ ہائیکو
موضوع	حمد باری تعالیٰ
لکھاری	صاحبزادہ محمد لطیف ساجد چشتی
پہلی وار	2025ء
چھاپن ہار	محمد احمد مجتبیٰ چشتی سیفی
ترنمین وٹائل	محمد علی چشتی
کمپوزنگ	چشتی کمپوزرز

چھاپن ہار

چشتی کتب خانہ

ارشدمارکیٹ جھنگ بازار فیصل آباد

انتساب

آدم سادات، جگر گوشہء امام عالی مقام

حضرت امام زین العابدین علیہ السلام

دے ناں

صاحبزادہ محمد لطیف ساجد چشتی

نذرِ عقیدت

شیخ سعدی علیہ الرحمۃ

دے حضور

صاحبزادہ محمد لطیف ساجد چشتی

صاحبزادہ محمد لطیف ساجد چشتی دی حمدیہ ہائیکو

محترم جناب ڈاکٹر احسان اللہ طاہر

گورنمنٹ کالج (بوائز) سیٹلائٹ ٹاؤن گوجرانوالا

”گنج شکر نے آن مکان کیتا دکھ درد پنجاب دا دُور ہے جی“ پیر وارث شاہ ہوراں
دے ایس مصرعے دی گل صوفیاں درویشاں اتے ساڈے ورگے عام لوکاں تے ہر سے وچ
آپواپنے علم تے مزاج مطابق کھل دی رہی اے۔ اک واری پیر ہوراں دا ایہ پورا بندھ پڑھ
لیئے۔

مودود دا لاڈلا پیر چشتی شکر گنج مسعود بھرپور ہے جی
خاندان وچ چشت دے کاملیت شہر فقر دا پٹن معمور ہے جی
بائیں ہی قلباں وچ پیر کامل جیوں دی عاجزی زہد منظور ہے جی
شکر گنج نے آن مکان کیتا دکھ درد پنجاب دا دُور ہے جی
اک کچھوں پنجابی زبان نوں بابا فرید الدین گنج شکر ہوراں اشلوک دی گڑھتی
دے کے ایہدے وچ رب سونے دی حمد کیتی تے دوجے بنے ایس نوں نوشہ گنج بخش
ہوراں واعظاں دا پانی لا کے ایہدے وچ ’اللہ والیو‘ بابا لوکا‘ سنو سگھڑے بالو‘ سائیں والیو
آکھ کے لوکائی نوں اپنے مالک تے خالق نال جوڑیا۔ ایسراں پنجابی زبان دی ٹردیاں
فقیراں تے درویشاں نے اللہ والیاں نے ایہدی انگلی پھڑائی تے اوہ ایہنوں اکوالف ترے
درکار، ربا میرے حال دا محرم توں دیاں لوریاں ساندے رہے۔ نوشاہیاں، چشتیاں تے
قادریاں فقیراں ایہنوں اپنے بولاں نال مالا مال کر چھڈیا۔ اوہناں جو لکھیا اوہ علامتی تے

تمثیلی حوالے نال! اکور انجھامینوں لوڑی دا، نی مائے مینوں کھیریاں دی گل نہ آکھ تے رانجھا
رانجھا کردی نی میں آپے رانجھا ہوئی، اکو سوہنے ربّ دی گل سی۔

پنجابی شاعری وچ وحدہ لاشریک دی حمد لکھن والے شاعراں ول جھاتی پائیے تے
اوہ سانوں کسے نہ کسے ایسے ذکر ہوئے سلسلے نال جڑے دکھالی دیون گے۔ اتے کجھ خاندان
ایسے نیں جہناں دی اگلی نسل نے اے وی ایہ حمد دا جھنڈا چکيا ہو یا اے۔ میں سمجھدا ہاں کہ
اوہناں دے جتے وچ اوہ سے جیہڑے علم دے رزق دی رت اے اوہنے ای اوہناں دے
وجود رکھ تے حمد دی سوچ دے پھل کھڑائے نیں تے اوہناں دا انگ انگ مہک اٹھیا اے۔
ہن ایسے پیار دی واشنا نال اپنے چوہیرے نوں مہکا رہے نیں۔ ایہناں وچ اک اچیراناں
محمد لطیف ساجد چشتی ہوراں دا اے۔

پنجابی ادب دی ہر صنف وچ حمد لکھی گئی اے۔ کیوں جے ایس نوں سخن دی اک
صنف منیا جاند اے۔ لوک ادب دیاں صنفیں ماہیے توں لے کے جدید تے نویاں صنفیں
وچ سانوں حمد دے جھلکارے مل دے نیں پر کتنا ہی صورت وچ لطیف ساجد ہوراں دی ایہ
دو جی حمد دی کتاب اے جنہوں پنجابی ادب وچ اولیت دا درجہ حاصل اے۔ ایس توں پہلے
اوہناں پنجابی قطعیاں وچ حمد لکھی تے ہن اوہناں پنجابی ادب وچ حمدیہ کلام ہائیکو دی صنف
وچ پنجابی ادب دے پلے پایا اے۔

لطیف ساجد چشتی ہوراں دی حمد پڑھدیاں دل دی روہی تے اکھر بدل بن کے
ورہن لگ پیندے نیں۔ اوہناں خواجہ غلام فرید دی روہی جیہڑی کہ وصل دی علامت اے۔
اودھام معنوی کھلاراک نویں روپ وچ پنجابی ادب نوں دتا اے۔ اوہناں کوشش کیتی اے کہ
صوفیاں درویشاں تے ولیاں دے اک خاص انداز توں باہر نہ نکلیا جاوے۔ اوہناں کول

روہی دا ذکر حمد لکھدیاں کدے پنجاب تے کدے کل انساناں دی وستی داروپ دھار کے
سامنے آؤندا اے جتھے رب سوہنے دی حمد کردیاں ہر پاسے ہریالی تے ساول وکھالی دیون
لگ پیندی اے۔ کدے کدے اوہناں دل دی روہی دے منظران نوں لاشریک دے
کرماں دے موراں نال پیلاں پاندیاں اکھراں نال انج بیانیہ اے کہ پڑھنہاراوہ ہائیکونوں
اک دوواری نیں، بار بار پڑھدا اے۔ ایس حوالیوں ساجد چشتی ہوراں دے کجھ ہائیکو دیکھو۔

اوس اسمان تھمیں بن سودھے

اوہدی قدرت نوں کون جانے گا

سڑدی روہی نوں پیلیوں ونڈدا اے

رحمتاں دا اوہ مینہ وساندا اے

دل دی روہی چ پھل کھڑ جاندا

مور روحاں دے پیلاں پاؤندے نیں

محمد لطیف ساجد چشتی ہوراں دی ہائیکو دے کجھ مصرعے اپنے اندر اک مکمل خیال،

اک رہتلی منظر تے پنجاب دی وسوں دی جیوندی جاگدی حیاتی دے منظر سنبھالی سامنے

آؤندے نیں۔ اوہناں نے اپنے ایہناں مصرعیاں وچ جھپڑے اکھری جڑتاں نال تے

اکھرجوٹیاں نال نویں محاوریاں تخلیق کیتے نیں اوہناں چوں ساجد چشتی ہوراں دی حمدیہ تخلیقی

دکھ دے نال نال اپنی دھرتی نال تے پنجابی زبان نال جڑی سانجھ وی وکھالی دیندی اے۔

جے انج ای دو جے سلسلیاں دے شاعران تقدیری ادب نوں آپو اپنے بزرگاں دیاں فکران

تے سوچاں نوں نویاں صفاں وچ اکھراں داروپ دینا شروع کردتاں تے فیروز پنجابی ادب نوں

ستے ای خیراں نہیں۔ ساجد ہوراں دی ایہ حمدیہ ہائیکو اکھراکھر مالک یوم الدین کیتا پان والے دن دے عادل تے الغفور دیاں رحمتاں تے نعمتاں دے بیان دے نال نال اوہ دیاں قدرتاں دے منظرانوں وی بیان کردی اے۔ کدے کدے تے اوہناں دی حمد پڑھ دیاں انج محسوس ہوون لگ پیندا اے کہ ساجد ہوراں تتلیاں، بھوراں، باگاں تے اوہدا نام چپ دیاں چڑیاں نوں اکو منظر وچ رکھ کے جنج بیان کیتا اے اوہ اوہناں دی تخلیق توں ودھ اوہناں دے مشاہدے تے تدبر تے تفکر دے روپ نہیں۔

اوہ جتھے وی انج دا کوئی منظر تے حسن سہپن تے خوب صورتی ویکھ دے نیں اوہ تھے ای اوہناں دے اوہدے پچھو کڑ وچ اوہدے المصور دا خیال آجاندا اے۔ ساجد ہوری اصولوں اپنے پڑھنہاراں نوں انج دے منظران چوں، حیاتیاں چوں تے ہر سہپن چوں اوس ”اللہ جَمِیلٌ وَ یُحِبُّ الْجَمَالَ“ دی یاد دواندے نیں جیہڑا اکھدا اے کہ کیہ تسیں گوہ نہیں کردے۔ ساجد چشتی ہوراں دے ہائیکو دے تنے مصرعے آپے وچ انج جڑے ہوندے نیں جیویں منظر دیاں کڑیاں آپے وچ جڑیاں ہوون۔ اوہ اپنے اکھراں نال، جیہڑے منظرانوں بیان کر رہے ہوندے نیں، اوہدے وچ رنگ نہیں بھر دے سگوں فطرت تے قدرت دے سارے کھلارے رنگاں نوں جیہڑے اوس تصویر وچ ہوندے نیں اوہنوں بیان کردے نیں۔ اوہناں رنگاں نوں اڈواڈ ڈھنگاں نال اکھراں نال صفیاں تے انج الیک دے نیں کہ پڑھنہاراں نوں اوس منظر، تصویر تے ماحول وچ زندگی دکھالی دیون لگ پیندی اے۔

سجرے پھلاں نے آکھیا اللہ

رب نے چھڑکی تریل پھلاں تے

تاہیوں خشبواں آیاں باگاں وچ

اڈدی تتلی جے حمد کردی اے
 اوہنوں پھلاں دا قرب دیندا اے
 اوہدے اکلاپے نوں مُکا چھڈ دا

فجرے پھلاں دے مُنہ ایں دھو دیندا
 عطر دیندا ترونک باگاں وچ
 چاہڑ دا مستیاں ایں بھوراں نوں

جلوے اوہدے جمال دے ویکھن
 بھور پھلاں دوالے گھمدے نیں
 حسن اوہدے نوں چُم دے رہندے نیں

پھلاں کلیاں نوں حُسن ونڈدا ایں
 تتلیاں چُمدیاں تیرے جلوے
 حمد تیری دے گیت گا گا کے

ساجدِ چشتی دی حمد وچ تتلی، پھل، خشبو، حسن، جلوے، بھانویں اک اکھر دے طور
 تے ورتے دسدے نیں اتے ایہ اوہناں دے اکھراں دی اُتلی پرت اے۔ جدوں اسیں
 گوہ کر کے اوہناں دی حمد نوں پڑھدے آں تے اسیں اپنے آپ نوں او سے تخلیقی تھاں تے
 کھلو تے محسوس کرن لگ پیندے ہاں جتے اوس ویلے ساجدِ چشتی ہو ری کھلو تے ہوندے
 نیں تے فیر سانوں تتلی تے پھل اک علامت تے اک کردار بن کے مل دے نیں۔ اک

قالب تے اک روح دی گل سناندے نیں تے پھل منکھ بن کے سکھاں تے نعمتاں دی خشبو
دین لگ پیندا اے۔ میرا مقصد اوہناں دی حمد دی تشریح یاں تفسیر نہیں پر اوہناں دی حمد نوں
ادبی تے علمی حوالیوں گوہ نال پڑھن داسدا ضرور اے۔

صاحبزادہ محمد لطیف ساجد چشتی ہوراں دی حمد وچ ہائیکو دے تن مصرعیاں چوں اک
مصرعہ ایسا وی مل دا اے جھیر انواں تخلیقی محاورہ بن دا اے۔ جھیدے وچ اچھی حمد تے بیان
ہوئی دس دی ہی اے پر اوہدے وچ پنجابی زبان دا حسن، تازگی تے نواں پن اک وکھرا ای مزہ
پیدا کر دا اے۔ شعری لسانیات نال تے حمد وچ تخلیقی حوالیوں اکھری جڑتاں تے ترکیباں
دے حوالے نال کم کرن والے نقاداں تے ریسرچ سکالراں لئی ساجد چشتی ہوراں دی پنجابی
حمد وچ بڑا کچھ اے۔ میں ونگی لئی اوہناں دے کچھ مصرعیاں دیاں مثالیں لکھدا ہاں۔

سوچ دی شاخ اتے حمد کھڑی

☆☆☆☆☆☆☆☆

من دے چرنے تے ذکر دی پونی

☆☆☆☆☆☆☆☆

اتھروواں دا ترونکا لاؤندے رہوو

☆☆☆☆☆☆☆☆

عیب عیبی دے ڈھکدا مولا

☆☆☆☆☆☆☆☆

دل دا کوٹھا وساوے ذکر اوہدا

☆☆☆☆☆☆☆☆

صاحبزادہ محمد لطیف ساجد چشتی ہوراں دی حمد دا سوما قرآن اے۔ اوہناں اپنی حمد
 نوں دو طریقیاں نال شہنگار یا اے۔ اک تے اوہناں قرآنی اکھراں نال اپنی حمد دی
 معنویت تے فکری کھلار نوں حُسن عطا کیتا اے تے دوجا اوہناں اوس وچار نوں کسے
 اکھر دے اشارے کنایے توں بناں اوس مفہوم نوں بیان کردتا اے۔ دوہاں حوالیاں نال
 اوہناں دی حمد پڑھنہاراں دے دلاں تے فکری اعتبار نال بڑے گہرے نقش چھڈ دی
 اے۔ اتے نویں لکھن والیاں نوں حمد لکھن دا ول وی دسد اے۔ اوہناں دی حمد دی اک
 خوبی ایہ وی اے کہ اوہدے وچوں سانوں ساڈے صوفیاں، درویشاں تے ولیاں دی
 شاعری دیاں علامتاں اوسے معنی تے فکری روایت نال جڑیاں دس دیاں نیں جس توں اک
 تے ایس گل دا پتہ لگدا اے کہ اوہناں اپنے ورگے صوفیاں دی شاعری دا مطالعہ رُج کے کیتا
 اے تے اوہناں دیاں وچاراں نوں اپنی روح وچ اتار یا ہویا اے۔ اوہ شاہ حسینؒ دے
 بولوں ”ہردم نام سنبھال سائیں دا، تاں توں استہر تھیویں“ دی گل اوہناں دی حیاتی نال
 بھرپور تے جیوندی و سدی علامت چرخی دی راہیں کر کے پڑھنہاراں نوں من دے
 چرخی تے ساہواں نال کتن دا درس دیندے نیں تے کدھرے سلطان باہو و رگی مرشد دی
 لائی نفی اثبات دی بوٹی دا ذکر وی بڑے من کھجیوں انداز نال کردے نیں۔ قرآنی معنیاں
 نال بھریاں ہو یاں اوہناں دیاں کجھ ہائیکو ویکھو۔

فَاذْكُرُونِي اَيُّهَا مَعْنٰی اِی

سبھ نوں بھلیں خدا نوں بھلیں نہ

ذکر دے نال زندگی دل دی

روحان جسامں دے پنجرے تاڑے
ہے نَفَخْتُ تھیں جان پا دیندا
زندگی موت سبھ دی ہتھ اوہدے

اوہ مَصَوِّر اُلکے تصویراں
نھیرے وچ وی کمال کردا اے
اوہدی رحمت سنبھال دی سبھ نوں

ایہ تن ہائیکو سانوں قرآن پاک دیاں اینہاں آیتاں ول گوہ کرن دا اشارہ
کردیاں نیں تے ایہناں دا مفہوم ساڈے تے شعری روپ وچ بڑے سوہنے ڈھنگ
نال کھول دیاں نیں۔ اوہ ایہ آیتاں نیں۔

هُوَ الَّذِي يُصَوِّرُكُمْ فِي الْأَرْحَامِ كَيْفَ يَشَاءُ
اوای ماواں دے رحم اندر جیویں دی چاہندا اے تو اڈی تصویر بناندا اے
[سورہ آل عمران: آیت ۶]

فَإِذَا كُرُّوْا فِي الْأَرْضِ فَاعْلَمُوْا
تسی مینوں یاد کرو میں تے میں تہانوں یاد کراں گا
[سورہ بقرہ: آیت ۱۵۲]

فَإِذَا سَوَّيْتُهُ وَنَفَخْتُ فِيْهِ مِنْ رُّوْحِيْ
تے جدوں میں اوہنوں ٹھیک کر لوں تے فیر اوہدے وچ اپنے ولوں خاص
پاک روح پادیاں۔

[سورة الحجر: آیت ۲۹]

ایس توں ذرا اگے ودھ کے جے اوہناں دی حمد ول جھاتی ماریئے تے سانوں
 کجھ فکری منظر انج دے بنے دس گے جنہاں نوں اوہ پڑھنہار بڑے چنگے تے سوکھے
 ڈھنگ نال سمجھ سکدے نیں جنہاں نے قرآن پاک دا بڑی ڈونگھی اکھ مطالعہ کیتا
 ہوندا اے۔ ساجد ہوراں دی حمد دے فکری انگاں نوں سمجھن لگیاں پڑھنہاراں دا
 قرآن پاک وچ غوطہ زن ہونا بڑا ضروری اے۔ انج تے اوہناں دی ہر فکر دا ابلاغ
 مکمل اے پر ہائیکو دا فکری حسن اوہدوں ای کھل داے جدوں اسیں اوس سوچ دے
 پچھو کڑسوے ول جھاتی مار دے آں اوہناں دیاں کجھ ہائیکو دیکھو کہ ساڈا دھیان ایدھر
 جاند اے کہ نہیں۔

ہر شے اوہدی اے حمد وچ رُجھی
 ذکر اوہدا اے جاری ہر تھاں تے
 ہر طرف اوہدے نور دے جلوے

روح کیہ اے جان سکدے نہیں
 اَمْرِ رَجِّ اے ایہو دسیا اے
 ایدوں اگے نہیں پیر پُٹ سکدے

کالے بدّل ہوا تھیں ٹور دیوے
 سکی ٹھیکر زمین سڑدی نوں
 رحمتاں نال اوہو ٹھار دا اے

تُسَبِّحُ لَهُ السَّمَوَاتُ السَّبْعُ وَالْأَرْضُ وَمَنْ فِيهِنَّ- وَإِنْ مِنْ شَيْءٍ إِلَّا
يُسَبِّحُ بِحَمْدِهِ وَلَكِنْ لَا تَفْقَهُونَ تَسْبِيحَهُمْ- إِنَّهُ كَانَ حَلِيمًا غَفُورًا-
[سورہ بنی اسرائیل: آیت ۴۴]

اوپدی ہی پاکی بیان کردے نیں ستے اسمان تے زمیناں اتے جو کجھ وی ایہناں وچ
اے اتے کوئی چیز ایسی نہیں جیہڑی حمد نہیں کردے پر تسی اوہناں دی تسبیح نہیں سمجھدے
بے شک او جان ہار تے بخش ہارے

وَيَسْأَلُونَكَ عَنِ الرُّوحِ- قُلِ الرُّوحُ مِنْ أَمْرِ رَبِّي وَمَا أُوتِيتُمْ مِنَ
الْعِلْمِ إِلَّا قَلِيلًا
[سورہ بنی اسرائیل: آیت ۸۵]

اتے او تہاڈے کولوں روح بارے پچھدے نیں تسیں آکھ دیو روح میرے رب دے
حکماں چوں اک امر اے تے اے لوکو! تہاںوں بہت تھوڑا علم دتا گیا اے
وَهُوَ الَّذِي يُرْسِلُ الرِّيحَ بُشْرًا لَبَدَى رَحْمَتِهِ ط حَتَّىٰ إِذَا أَقْلَتِ سَحَابًا
ثِقَالًا سَقْنَاهُ لِبَدًا مَّيِّتٍ فَأَنْزَلْنَا بِهِ الْمَاءَ فَأَخْرَجْنَا بِهِ مِنْ كُلِّ
الشَّجَرِ ط

[سورۃ الاعراف: آیت ۵۷]

اورب اے جیہڑا رحمت دے مینہ توں پہلاں ہوواواں نوں گھلدا اے تے او خوش کر
دیندیاں نیں ایتھوں تک کہ او ہوواواں بھاری بدلاں نوں چک لیندیاں نیں اتے
اسیں ایہناں بدلاں نوں کسے سکی پوئیں ول لے جاندے ہاں تے فیر ایس بدل چوں
پانی ورساندے ہاں تے فیر ایس پانی چوں ون سونے میوے نکل دے نیں۔

صاحبزادہ لطیف ساجد چشتی ہوراں دی حمد وچ ساڈیاں کلاسیکی تے صوفیانہ
فکری روایتاں اک نویں سرے توں فیر پنگردیاں دس لگ پیاں نیں اتے خوشی دی گل
ایہ وے کہ اوہناں ایس روایت نوں حمد دے راہیں اگے ٹوریا اے۔ بابا فرید الدین گنج
شکرؒ ہوراں جیویں اپنے اشلوکاں راہیں لوکائی نوں احکم الحاکمین دی بادشاہی دی گل
سنائی سی اتے اج ایسے سلسلے دے اک فقیر تے درویش انسان پنجابی حمد وچ
پنجابیاں نوں حمد کرن دیاں نعمتاں تے دولتاں دی گل اوہدے ذکر وچ سنار ہے نیں۔

ساجد چشتی ہوراں دی حمد پڑھ کے جھیر چانن دل وچ ہوندا اے اوہی چانن
جے انسان دا ذکر تے ورد بن جائے تے فیر قور دیاں کندھاں تک اوہ چانن نال
رہوے گا۔ 'سائیں میرے چنگا کیتا' ورگے بولاں نوں موصوف نے ہائیکو وچ جھیر
رنگ دتا اے اوہ فکری اعتبار نال ایڈاپکاتے ڈونگھا اے کہ پڑھنہاراں دے مونہوں
اپنے آپ ای پیا نکل دا اے۔ 'نام سنبھال سائیں دا'، 'نی! تینوں رب نہ بھلی ہو رسب
گجھ بھلی اک رب نہ بھلن جہیا'، اتے 'کھلے تنہاں باب قبول اندر جہناں کیتا ہے عشق
قبول میاں'۔ ایسراں ساجد چشتی ہوراں حمد دے راہیں بھلے ہوئے پنجابی نوں اک
واری فیر صوفیاں دا ادب یاد کروا کے ایہنوں اوہ راہ ول ٹورن دی کوشش کیتی اے
جھیرؒ راہ سدھاوی اے تے مولا والاوی اتے ایہوای ساڈی حیاتی دا مقصد وی اے۔
اللہ کرے ایس حمد دے صدقے اوہناں دا قلم انج ای پنجابی ادب نوں ون سونیاں حمدیہ
لکھتاں دان کردار ہوے۔ آمین

نُور ای نُور ذات اوہدی اے
 نُور ونڈ دا اے اوہ زمیناں نوں
 نور دیندا اے آسماناں نوں

اوہدی وحدت دی ساری کثرت اے
 اوہ اے معبود سارے عابد نے
 اوہدا دِسدا جمال ہر شے چوں

کیوں سہارا کسے دا میں لوڑاں
 تیری رحمت ای مینوں کافی
 تیرے در توں زمانے پلدے نیں

ذات تیری قدیم اے مُڈھوں
گُنٹ گُنڑا تھیں راز کھولدا ایں
فیر وی لکيا ایں وِچ حجاباں دے

روشنی ونڈ دا ایں ستاریاں نوں
بلدی دھرتی نوں ٹھار دیندا ایں
پدی مخلوق تیرے در اُتوں

پھلّاں کلیاں نوں حُسن ونڈ دا ایں
تتلیاں چُمدیاں ترے جلوے
حمد تیری دے گیت گا گا کے

توں اَلَسْتُ پُکاریا جس دم
 آئی اگوں صدا بلی دی سی
 تیرا اِظہار ہویا رُوحاں تے

عرش پانی تے اِنج ٹکایا اے
 بھیت آیا سمجھ نہیں لوکاں نوں
 تیری مرضی تے تیری قُدرت دا

رب ای گھلدا اے پانی اَسمانوں
 اوہ چلاؤندا اے ندیاں نالے
 دھرتیوں پھل نوں اُگاند اے

تینوں اوّل کہواں تے ٹھیک آکھاں
 اک دا ادھ نصف آپے دسدا ایں
 ایہ وی رولا نہیں میرے توں مُکدا

عکس آپے تے شیشہ ساز آپے
 بانسری دی آواز وی اوہو
 اوہدی وحدت دی دس دی کثرت اے

اوہ مُصَوِّر اُلکیے تصویراں
 نہیرے وِچ وی کمال کردا اے
 اوہدی رحمت سنبھال دی سبھ نوں

مان رکھدا اے اوہ غریباں دا
 اوہدی رحمت دا حد بنّاں نہیں
 جگ پل دا اے اوسدے در توں

کالے بدّل ہوا تھیں ٹور دوے
 سکی ٹھیکر زمین سڑدی نوں
 رحمتاں نال اوہو ٹھار دا اے

کڈھ دا سورج اے رات دی لکھوں
 اوہدی قدرت خیالوں اُچی اے
 کوئی وی اوہنوں جان نہیں سکيا

اوس آسمان تھمیں بن سودھے
 اوہدی قدرت نوں کون جانے گا
 سڑ دی روہی نوں پیلوں ونڈ دا اے

اگ نوں گلزار اوہو کر دا اے
 پانی چلدے نوں اگ کر دیوے
 عقلاں فکراں چ آ نہیں سکدا

اوہدی رحمت اے برف دے وانگوں
 سڑ دے سینے نوں ٹھار دیندا اے
 رب خزاں نوں بہار کردا اے

چنگے ماڑے دوہاں نوں دیندا اے
 صِبْغَةَ اللّٰہ دا رنگ ونڈ دا اے
 اوہدی رحمت کمال کردی اے

اوہ خیالاں توں بہت اُچّا اے
 ہاں اوہدا ناں مثل ہے اوہدی
 اللّٰہ اپنے کمال وِچ کلا

چانناں دِل چج کردا ناں اوہدا
 ذکر اوہدا ای اطمینان دے
 ہے سکون اوہ ای دیندا روحاں نوں

ذکر دی بُوٹی لگ دی جس دم
نُور اُوندا اے کالے دل اندر
فیر ساہواں وی مہکاں وَنڈ دیاں نیں

کہہ کے کُن اوس خلقی ہر اک شے
اوہنوں نہیں لوڑ کجھ کسے دی وی
جو وی اوہ چاہوے آپے ہو جاندا

کائناتیں بنان والا اے
کہکشاں اوس کولوں نُور لَوے
اپنیاں قُدرتاں کرے ظاہر

پھوک اوہدی توں رُوح وی جگ دی اے
چشمے پھٹدے نیں کالے پتھراں چوں
اوس دے کم سب نرالے نیں

گونگے اکھراں نوں جان سکدا اے
کوئی غیب اوس توں کدوں لگیا
سارے ای عالماں دا عالم اے

اوہدی رحمت دی باشا کھلری
پھلاں کلیاں نوں تتلیاں آکھن
ذکر رب دا بڑا ضروری اے

جلوے اوہدے جمال دے ویکھن
 بھور پھلاں دوالے گھمدے نے
 حسن اوہدے نوں چم دے رہندے نیں

نفس قابو دے وِچ نہیں اَوندا
 ایہنوں زنجیر پا دے یا مولا
 ایہو ہر ویلے ہے دُعا میری

موسماں دا اے اَوناں جاناں کیہ
 سارے رنگاں دا اوہ ای محور اے
 کھول دیندا اے در ہواواں دے

کنزِ مخفی اے نُورِ ذاتِ اوہدی
ہستیِ اوہدی ناں آوے عقلاں وِچ
سارے عالم دا کلاّ جانو ایں

آس دے بوٹیاں تے بُور آوے
اوہدی رحمتِ نزولِ جدِ کردی
ہُنڈے آباد آپے وِیرانے

بجلیاں بھر دے اوہ بدلاں وِچ
دیوے ہریالیاں اوہ رُوڑی نوں
اوہدی رحمتِ دی حد نہیں کوئی

اوہنے اکھر سکھا کے آدم نوں
 کیتا اظہار اپنے علم دا اے
 رُتبہ بندے دا وی ودھا چھڈیا

ذّرے ذّرے دی اے خبر اوہنوں
 قطرے قطرے توں ذات واقف اے
 اوہ عَلِیْمٌ خَبِیْرٌ ہے مولا

ذات وِج تے صفات وِج اعلیٰ
 عقلاں فکراں دی حد توں ہے اگّے
 کون اوہنوں پہچان سکدا اے

حرف حرفاں دے نال جُڑ دے نیں
 اِسم اوہدا نہیں حرف دا قیدی
 حرف وکھرے وی معنی دیندے نیں

اوہ ازل تے ابد دا جانو ایں
 بھیت ہر شے دا اُس تے گھلایا اے
 اوہ سہ دے ہے گیڑ توں اُچا

کیتی گل کتھ جو نال سوہنے دے
 گھل دتی کتاب دی صورت
 اپنا پیغام آخری دتا

اوہدا ناواں ایں اوہدا سرناواں
نام اپنے چ ہويا ظاہر اے
ذات اوہدی اے بات توں اُچی

جو وی بنیا ایں اوہنے ڈھیناں ایں
ایہو دسیا کتاب وِچ اوہنے
باقی رہنی ایں ذات بس اوہدی

دِل چ لو ہووے اوہدا نام لیاں
مِلدا رُوح نُوں سکون جاندا اے
اللہ کلا اے رب زمانے دا

دُبے بیڑے تراوے نام اوہدا
 غم مٹاوے کرم اوہ کردا اے
 ورد اوہدے ای ناں دا کر دا رہو

دل دا کوٹھا وساوے ذکر اوہدا
 وصل دی روشنی عطا ہندی
 نور وحدت دا ہر طرف دِسدا

بھکھے رجدے نیں اوہدے بُوہے توں
 رب خالی کسے نوں نہیں گھلدا
 اوہ سخی اے غنی ایں رازق اے

جان وختاں توں اوہ چھڑاؤندا اے
 غم دے نہیرے سویر وِچ بدلے
 کردا اِسراں کرم نوازی اے

بلدی بھندی اوہ روہی نوں ٹھارے
 کھنگراں نوں اوہ ہیرے کر دیندا
 کم اوہ سار دا زمانے دے

اپنی مخلوق نُوں بھلاؤندا نہیں
 اوکڑاں مُشکلاں نُوں کٹ دا اے
 غم دی دُھپ وِچ اوہ سایہ کر دیندا

پہر پچھلے اوہ واجاں مار دا اے
جاگ کے نعمتاں لوو لوکو
کھل گیا جے کرم دا دروازہ

اوہدی مرضی کرے اوہ جو چاہوے
پھکے رنگاں نوں گوڑھے کر چھڈے
اوہدی قدرت دے رنگ وکھرے نیں

اوہدے کُن دی سدا اے اِنج گونجی
جدھروں لنگھی کمال کیتا اے
کائناتاں وجود وِچ آیاں

جن تے انسان نے عبادت لئی
ایس اعلان نوں جو نہیں من دے
کسراں عرفان رب دا پاؤں گے

اوہنوں تے لوڑ نہیں کسے شے دی
ہر خزانے دا اوہ اے ورتاوا
بھردا پلے جہان سارے دے

سکھنے ٹھوٹھے چ خیر پوندا اے
رزق گھلدا اے کلا ہر اک نوں
ساری مخلوق اوہدا کھاندی اے

اوہدیاں نعمتاں دی حد ای نہیں
ون سونے کھواندا ایں کھانے
ٹھنڈیاں واواں دے دوے تحفے

چاہڑ سورج اوہ جگ تے لو کردا
رات کالی نُوں چن دا نُور دوے
اوہدے نُوروں ای نُور سارے نے

بُھلے بھٹکے نوں سدھی راہ دے
ٹھیڈے کھاندے نوں سانجھ دا مولا
اوہدی رحمت دی حد نہیں کوئی

پیدا کیتا اے اوہنے دُنیا نوں
 کردا رحمت دی چھاں زمانے تے
 اَنّ پانی دا بندوبست کرے

عیب عیبی دے ڈھکدا مولا
 دیندا مجرم نوں وی معافی اے
 رحمتاں بے حساب کر دیندا

فجرے پھلاں دے منہ ایں دھو دیندا
 عطر دیندا ترونک باگاں وِچ
 چاہڑ دا مستیاں ایں بھوراں نوں

اُڈ دی تتلی جے حمد کردی اے
 اوہنوں پھلاں دا قُرب دیندا اے
 اوہدے اکلاپے نوں مُکا چھڈ دا

حرص دی اگ جے ساڑ دی دل نوں
 ٹھنڈ پوندا اے نعمتاں دے کے
 اپنے بندے دا اِنج بھلا کردا

دیندا بے انت نعمتاں مالک
 دُکھاں درداں دی اے دوا کردا
 بھر دا پلے سدا غریباں دے

انج و ساوے اوہ دل دی روہی نوں
گھل دا رحمتاں دی اوہ بارش
پیار دے پیلو پک دے جاندے نیں

کھوٹی تقدیر نوں کھری کردا
خالی کلکھ نوں وی بھاگ لگدے نیں
اوس دا جس گھڑی کرم ہووے

بوٹے آساں دے ٹہن تے لاوے
کنڈے راہواں دے دُور کر چھڈ دا
اوہدی رحمت دا کوئی ناں حد بتاں

اوہدی مرضی بناں نہیں کجھ ہندا
 حکم اوہدا ای چل دا سب تے
 ساری دُنیا بچائی رکھدا اے

اوہنوں دھوکھا نہیں کوئی وی دے سکدا
 کوئی شے وی نہیں اُس توں اوہلے وِچ
 سب دا راکھا اوہ اک اکلا اے

پاک ہر اک مثال توں مالک
 دھیاں پُتراں دی نہیں لوڑ اوہنوں
 ساری مخلوق اوہدا گُنہہ اے

پالدا اے جہان سارے نوں
تھوڑ اوہنوں کیویں ہے ہو سکدی
اوہدے ہر دم بھرے خزانے نیں

اوہ ای جانو ایں سارے سمیاں دا
موسماں نوں اوہ دکھرے رنگ دیوے
رحمتاں اوہدیاں نے جگ اُتے

جگ دا میلہ سجایا ہے اوہنے
اُچی سوچاں توں پاک ذات اوہدی
وصف اوہدے کوں بیان کراں

ہر گیانی اے لبھ دا اوہنوں
 اوہنوں لبھن دی لوڑ نہیں کوئی
 اوہ تے بندے دل چ وسدا اے

نفس اپنے نوں جیہڑا جان لووے
 اوہنوں دیندا اے معرفت اپنی
 قُرب اپنا اے رب عطا کردا

نَحْنُ أَقْرَبُ ہے آکھ کے دسیا
 رب تری شہ رگوں وی نیڑے ہے
 اپنے اندر توں بندیا پا جھاتی

ڈوری ساہواں دی ہتھ ہے اوہدے
 اوہدے ناویں حیاتی لائی رکھ
 تینوں نائب جہنے بنایا اے

اَنّ پانی دی لوڑ نہیں اُس نوں
 ناں اوہ جاگے تے ناں اوہ سوندا اے
 موت اوہدے نہیں لاگے آ سکدی

اوہناں بھلناں ای موت دِل دی اے
 جیہڑے رہندے نیں یاد وِچ اوہدی
 موت کولوں کدی ناں مردے نیں

اگ پانی اوہ کٹھے کر سکدا
 حکم اوہدا کدی وی ٹلدا نہیں
 اوہدی رحمت نوں ٹولدے رہیے

لوح محفوظ اُتے آپے لکھ دا اے
 اوہدی مرضی ، لکھے ، مٹا دیوے
 اوہنوں کوئی وی پچھ نہیں سکدا

اوہ جے مارے تے نفس مردا اے
 ذکر اوہدا ای دل کرے زندہ
 سانوں سوہنے نبی نے دسیا اے

دُنیا عُقْبی دے وِچ دے عزت
اپنے ذاکر نوں پیار کردا اے
مرن بعدوں وی زندگی دیندا

اوہدا رستہ ای سدھا رستہ اے
وِنگی ٹیہڈی ناں راہ تے ٹریے
اوس دی راہ ای اوس توں منگو

دِل دے کوٹھے نوں پوچ کے رکھو
اتھرواں دا ترونکا لاؤندے رہو
آپ آوے گا گھر چ گھر والا

جان دا ایس تُوں میرے اندر نوں
 میں ای چنگیاں نہیں کر سکیا
 فر وی رحمت لُٹائی جانداں ایس

شکوے کیتے میں شکر نہیں کیتا
 نعمتاں ون سوئیاں کھاہدیاں نیں
 بندگی دا نہیں حق ادا ہويا

جو وی منگیا عطا توں کر چھڈیا
 میرے جُرمیں نوں توں لُکا یا اے
 تیری رحمت بیان کنج ہووے

اُڈ دے پنچھی وی تیرے ذا کر نیں
 بندے دھرتی تے تیتھوں دور رہے
 ظلم کردے نیں اپنی جان اُتے

گورے کالے دا توہیوں مالک ایں
 دیندا ہر اک نوں فرق رکھدا نہیں
 جو وی منگدا اے پلے بھر دا ایں

تیرے حکموں نظام چلدا اے
 رات تے دن جو اوندے جاندے نیں
 تیریاں گلاں ہر طرف جاری

اُس توں دوری چہدی اے ہو جاندی
 بے سکونی دے گھیرے وِچ اَوندا
 اوہنوں بندیا کدی وی بھلیں ناں

اوہ اے سَتَّار عیب کجدا اے
 اُس غَنِی دا فقیر جگ سارا
 رحمتاں نال جھولی بھر دیندا

تیر تقدیر دا چلاوے جے
 بچناں ساڈا محال ہو جاوے
 اوہدی رحمت نوں وانج ماری جا

اُس توں ودھ کے عدل ہے کس کرناں
 تکرری محشر دیہاڑے لاوے گا
 اوہی تکرری نیں جھول کھاناں نہیں

ڈوبے فرعون نوں اوہ پانی وِچ
 خُشک راہ موسیٰ دے لئی کڈھے
 اپنی قُدرت اوہ اِنج وکھاؤندا اے

اک مچھر دماغ وِچ گھل کے
 توڑ دیندا غُرورِ نمرودی
 توں وی نمرودی سوچ چھڈ بندیا

کردا زندہ اے موئی دھرتی نُوں
 مینہ جدوں رحمتاں دا پا دیندا
 بھوں تے ستے ای رنگ کھلار دوے

جبر کردا نہیں اوہ کسے تے وی
 دیندا اے اختیار عملاں دا
 آخرت وِچ ضرور چھپے گا

ہووے کڈّا وی کاریگر کوئی
 اوہ نہیں مجھڑ دا پَر بنا سکدا
 اوہدی قُدرت نُوں منناں پیناں

اَن گنت اوہدیاں نیں مخلوقاں
سب دا خالق اے سب دا رازق اے
رِزق سب نوں سدا گھلاؤندا اے

حُسن یوسف نوں بخشدا ایسا
جو وی تکدا سی دِل نوں پھڑ دا سی
ویکھ کے اوہنوں بھکھے رجدے سی

اوہدی ہر شان دا ظہور نواں
ویکھ دے بین اوسدے عاشق
اوہدے بوہے توں تاہیوں ہلدے نہیں

عارفاں تے اوہ بھیت کھول دا اے
 اوہدی کثرت چ اوہدی وحدت اے
 اوہ ای باطن اے اوہ ای ظاہر اے

پیار کردا اے پیار ونڈ دا اے
 اوہدی رحمت دا حد بتاں نہیں
 رحمتاں نال بھر دا اے پلے

ذکر اوہدے دا معجزہ اہ ہے
 عشق دی بُوٹی دل چ جد مہکے
 مستیاں چڑھ دیاں نین روحاں نوں

سُن دا مجبور دی صدا اوہیو
 اوہ ای نپدا اے دھون ظالم دی
 جنہوں اوہ پکڑے چھٹ نہیں سکدا

ماڑیاں دا سہارا بن دا اے
 کردا کمزور نوں ایں زور آور
 بے حساب اوس دا کرم ہندا

فَاذْكُرُونِي تے ہے عمل جس دا
 اوہدا ذاکر اوہ آپ ہو جاوے
 کئی رحمت میرے خدا دی اے

اوہ نہیں من دا دِلوں کدی رب نوں
 جہڑا غیراں دے بوہے جاوے گا
 اوہدا پکا یقین رب تے نہیں

ہر شے رُجھی اے اوہدی تسبی وِچ
 بھاویں خُشکی دی یاں تری دی اے
 ذکر اوہدا ای ہر تھاں جاری اے

اوہدے گُن دا اِشارہ ہو یا تے
 نقطیوں خط وجود پایا اے
 اک نقطہ ای دائرہ بنیا

روح کیہ اے جان سکہے نہیں
 اَمْرِ رَیِّ اے ایہو دسیا اے
 ایدوں اگے نہیں پیر پُٹ سکہے

عقلوں فکروں گمان توں اُچا
 حداں وِچ اوہ کدی نہیں آسکہا
 کون اوہدے وجود نوں جانے

جُھلدے جھکھڑاں نوں اوہ ای ڈکدا اے
 اوندے طوفان روکدا رب اے
 اوہدی رحمت بچاؤندی ودھ ودھ کے

اوہدے دم نال ای دم اے آدم دا
نوحی بیڑے دا اوہ محافظ اے
اگ کر دا خلیل تے ٹھنڈی

بُھکھے تسیاں نوں رب رجا دیندا
رِزق کڈھ دا زمین دے وِچوں
رحمتاں اوہ کمال کردا اے

رکھی پانی دے وِچ حیاتی اے
ساہواں قائم ہوا دے نال کرے
اوہدی قدرت نوں بندیا ویکھ تے سہی

بحر ڈوہنگے چوں راہواں کڈھ دیندا
 مرضی اوہدی اے چلدی ہر تھاں تے
 اوہ کنارے تے ڈوب سکدا اے

پنچھیاں نوں اوہ پر عطا کردا
 مچھیاں نوں تراوے پانی وِچ
 پتھراں چوں اوہ کیڑے پال دا اے

پینگھ اسمان تے اوہ چاہڑ دے
 قطرے پانی دے رنگ ونڈ دے نے
 اوہدے کارے سمجھ نہیں اوندے

کانیاں نوں اوہ زور دے سکدا
 سخت لوہے نوں کھور سکدا اے
 اوہدی طاقت دا حد بتاں نہیں

تگڑیاں نوں اوہ کاٹھی پا دیندا
 اوہدی قوت نوں کون جان دا اے
 عدل کردا تے پورا کر دا اے

روحاں پھو کے تے روحاں کڈھ دا اے
 اوہدیاں قدرتاں دا انت نہیں
 اُچا اے ساریاں خیالاں توں

ہنس کے پھلاں نے حمد کیتی
 کلیاں وی ورد کیتا اللہ ہو
 رحمتاں دی سی ورھ پئی بارش

اوہدی رحمت تے جے بھروسہ نہیں
 اوہنوں مومن کدی نہیں کہہ سکدے
 گل ایہو ای حقّی سچّی اے

سجّرے پھلاں نے آکھیا اللہ
 رب نے چھڑکی تریل پھلاں تے
 تاہیوں خشبواں آیاں باگاں وچ

اَکھ سورج نے کھولی جس ویلے
 ڈیرے چکے سی رات کالی نے
 روشنی رب کھلاری دُنیا تے

دیوے اشکاں دے بال کے رکھئے
 دُور قسمت دے نہیرے ہوون گے
 گور کالی چ نور اُترے گا

پلے بھر دے نے اوس دے درتوں
 پال دا رب اے ساری دُنیا نوں
 کم ہر اک دا اوہ بناؤندا اے

دھڑکنناں دِل دیاں اوہ سُن دا اے
 جان دا اے خیالاں وِچ کی اے
 عِلْم اوہدے نُوں کون جانے گا

دُڈھ پُتر عطا اوہ کردا اے
 لَیندا گُجھ نہیں دوے اوہ سبھناں نوں
 گھاٹا اوہنوں کدوں کسے شے دا

جھڑے کر دے نے ذکر اللہ ہو
 ہو دے نیڑے اوہ ہندے جاندے نے
 قسمت اوہناں دی جاگ پیندی اے

نام اوہدا چتار دے رہیے
 کم سب تو ودھیک سوہنا ایں
 ذکر دے وِچ سکون ملدا اے

رحمت اوہدی جدوں اے ہو جاندی
 سکی ٹھنی تے بُور آجاوے
 نور ملدا اے انھیاں اکھیاں نوں

اوہنے سنسار سارے خلقے نہیں
 اوہ ارادہ جدوں وی کردا اے
 گن اشارے دے نال کم ہندے

جن انسان حُوراں تے پریاں
پیدا کیتے نے سارے گُن کہہ کے
حمد اوہدی ہمیش کردا رہو

سکّیاں ٹاہناں نُوں ساوے کر دیندا
اگ پانی دا میل کرواوے
اوہدی قُدرت لئی غیر ممکن نہیں

اوہنے پھلاں نوں لکھاں رنگ دتے
گھا دے رنگاں دا کجھ شمار نہیں
اُپنیاں قُدرتاں اوہ جان دا اے

اگ پانی ہوا تے مٹی نوں
 کٹھیاں آدم دے وچ ہے کر دیتا
 واہ واہ قدرت کمال اوہدی اے

اوہ ہے ہر اک مکان دا مالک
 قید ہندا نہیں اوہ مکاناں وچ
 کبریائی دا حد بتاں نہیں

شور دھرتی چوں پھل اُگا دیندا
 سڑیاں رڑیاں نوں بھاگ لا سکدا
 جو وی چاہوے اوہ کر وکھاؤندا اے

عرش اُگے ہے جھکدا سورج وی
چن آکے سلامی دیندا اے
نور منگ دا اے نور دے کولوں

کوئی کڈا وی شان والا اے
اوہدے در دا سوالی ہووے گا
اوہدے در توں ای خیر منگ دا اے

اوہدے قہروں ہمیشہ ڈریا کر
جو وی اوہدی پکڑ چ آجاوے
اوہنوں ملدا کتے ٹکانہ نہیں

کبریائی اے اوس دی چادر
وڈا اوہدے توں ہور کوئی نہیں
اوہدے اگے ای جھکناں چنگا اے

لوح اوہدی قلم وی اوہدا اے
لکھ دا مرضی دے نال اوہ جو چاہوے
لکھیا اپنا وی اوہ مٹا سکدا

جے اوہ چاہوے تے سونا ریت بنے
ڈھیلے مٹی دے سونا کر سکدا
اوہدی مرضی تے اوہدی مرضی اے

کوئی تھاں وی نہیں اوس توں خالی
ہے اوہ تھاں تے مقام توں اُچا
اوناں جاناں نہیں اوہدا دس سکہ دے

آپے ظاہر اے ہويا کثرت وِچ
اپنی وحدت نوں آپے جان دا اے
اوہدے ہر تھاں نشان دِس دے نے

نقش ایسے اُلکیے رب سوہنا
وِچ دِلاں دے جو گھب دے جاندے نے
جو بھلایاں وی بھل نہیں سکہ دے

اوہدے نُورِوں ای فُجراں کو دیوں
شام اُوندی اے اوہدی مرضی تھیں
رحمتاں ساریاں نیں بندیاں لئی

ٹمٹاؤندے جو راتیں تارے نیں
رُجھے رہندے نے حمد اوہدی وِچ
نور کرناں دا اوہدے توں منگ دے

جد وی پَیندی تریل پُھلاں تے
سادھ لَیندے نے پُھل وضو سارے
رَل کے پڑھدے ناد حمداں دی

بحر کردا اے بند قطرے وِچ
 ذرّیاں نوں اوہ زر بناؤندا اے
 کون سمجھے اوہدے کمالاں نوں

کال کٹ دا اے نال رحمت دے
 تہہ مکاؤندا اے پانی برسا کے
 اپنے بندیاں لئی کیہ اوہ نہیں کردا

جو وی قُدرت دے نال سرجیا اے
 مین میکھ اوس وِچ نہیں چھڈی
 اوہدی کاریگری کمال دی اے

حمد آکھاں تے کس طراں آکھاں
اوہ اے اُچا خیال نیویں نیں
ذّرہ اسمان تک کیویں پہنچے

رَبّ سچّے نے رونقاں لائیاں
میلہ جگ دا سجایا کُن کہہ کے
گھلیا ساہنوں اے میلہ ویکھن لئی

اوہ ای تقدیر ساز اے دُنیا دا
لکھدا تقدیر اوہ اے ہتھیاں تے
گل وِگڑے تے اوہ بناوندا اے

اک تجلی تھیں طور نوں ساڑے
 جھال موسیٰ نہ جھل سکے اوہدی
 اوہ حجاباں پچ آپ لگیا اے

شہ رگوں وی قریب رہندا اے
 نظریں اوَندا نہیں ویکھ سکدے نہیں
 اوہدا قُرب و حضور کنج سمجھاں

جس دی ہندی رسائی اوہدے تک
 اوہ نہیں ویکھدا دُنیا داراں ول
 عشق اوہدے پچ سڑ دا جاندا اے

یاد اوہدی تے ذکر اوہدے نے
کڈی کیتی کرم نوازی اے
غم کوئی لاگے اُون نہیں دِتا

کالے جُرمیں نوں جس گھڑی تہکاں
شرم دا مارا دُب دا جاندا ہاں
اوہدی رحمت نوں واجاں ماراں میں

کوڑھ دِل دا کھروچ دا رہنا
اپنے جُرمیں نوں یاد کر کر کے
اتھرو آپو آپ کردے نیں

خالی لگھ نُوں اوہ لال دیندا اے
 ٹھوٹھے بھر دا اے بھکھ مُکا دیوے
 اوہدی رحمت دا گُجھ شمار نہیں

جلوے اپنے توں پردہ جد چُک دا
 چن پچھے چکور لا چھڈے
 ذات اوہدی سمجھ چ اؤندی نہیں

جیندے کڈھ دا اے مُردیاں وچوں
 سخر دُھپّاں نوں برف کردا اے
 موت تے زندگی اوہدے ہتھ وچ

جُرمِ کردا ہاں ٹھیڈے کھاندا ہاں
توبہ کردا ہاں توڑ دیندا ہاں
اوہدی رحمت دے میں سہارے تے

چڑھدیوں چاڑھ دا اے سورج نوں
لیندے پاسے اوہ ڈوب دیندا اے
حکم اوہدا سدا توں جاری اے

تار دیندا اے لوہیا پانی تے
تاروواں نُوں کنارے تے ڈوبے
اُس دے کماں نوں جان سکدے نہیں

اوہ کھواندا اے آپ کھاندا نہیں
 پلے بھر دیندا اے سوا لی دے
 خالی گھلدا کدی نہیں بوہے توں

کھارا مٹھے دے نال کھیندا اے
 اک دوجے چ رل دا نہیں پانی
 دیکھ نظارہ اوہدی قُدرت دا

ست آسمان ست زمیناں وِچ
 اوہدی قُدرت دے لکھاں نظارے
 اکھ حیرت چ ڈب دی جاندی اے

اوہدی رحمت جدوں نزول کرے
کھول لَیندی اے سپی مُنہ اپنا
موتی بن دا اے قطرہ پانی دا

اک دانہ جے بیج دا بندا
اوہدی رحمت نواز دیندی اے
ست سو دانہ کسان چکدا اے

اوہدی مخلوق جو سمندر وِچ
کون اوہدا شمار کر سکدا
گنتیاں وِچ کدی نہیں آ سکدی

پانی برسایا بدلاں راہیں
دھرتی نوں اُس حیاتی بخشی اے
سوہنے پھلاں نوں رنگ دتے نے

کہکشاواں نوں نور وَنڈیا اے
سونا رکھیا اے اوہنے دھرتی وِچ
اوہدی قُدرت کمال کردی اے

اک قطرے توں جُشہ گھڑ دا اے
رُوح پھوکدا اے اوہ اپنی
مٹی دے بُت نوں ٹور دیندا اے

فجرے سد ماردی اوہدی رحمت
دِن نوں کڈھ دا اے رات دی لکھوں
کٹ دیندا اے سچا رب نھیرے

ماس نونہ توں جیویں نہیں وکھ ہندا
ملدی رحمت اے اوہدے بندے نوں
رحمتاں نال نال کر دا اے

جی قیوم ایں موت اوہنوں نہیں
مردیاں نُوں اوہ زندگی دیوے
اوہدی قدرت نوں کون سمجھے گا؟

جھڑا رَل دا اے نال سچیاں دے
قُرب اللہ دا اوہنوں ملدا اے
باغِ جنت دا اے عطا ہُندا

حق ادا حمد دا کراں کیویں
شان اُچی اُہدی گمانوں ایں
لفظ اوہدا نہیں گھیرا کرسکدے

جد اَلَسْتُ پُکاریا رب نے
اوہناں رُوحاں بلی پُکاریا سی
جنہاں اوہدی پچھان کر لئی سی

حمد دا نغمہ جیہڑا گاؤندا اے
 اوندا رحمت دے سائے دے تھلے
 اوہنوں ابدی سُرور مل جاوے

دکھ رب دی ہے جس تُوں مل جاندی
 بندہ دکھ ہووے ساری دُنیا توں
 رب دی سردل توں مُول نئیں ہل دا

مَالِکُ الْمُلْکِ ، لَا شَرِیکَ اے اوہ
 اوہدی کدھرے مثال ہو رہی نہیں
 اَللّٰہ کَلَّا اے اوہدا ہاں کدوں

اوہدے نُوروں جہان روشن ایں
 کھڑدے پُھلاں نے ایہو دسیا اے
 حُسن اوہدا اے ہر نظارے وچ

سبھے صفتاں نے تیریاں ربا
 تیری قُدرت دا اُنت نہیں کدھرے
 ہر شے تیری گواہی دیندی اے

تیرے ای نُور دے نظارے نے
 چوداں طبقاں چ تیرے جلوے نے
 ہر تھاں تیرا ای چانناں دِسدا

جد چھلکدا سمندر اکھاں چوں
اوہدی رحمت قریب اوندی اے
ٹُٹے دِل نُوں سکون مل دا اے

رحمتاں دا وہ مینہ وساوند اے
دل دی روہی چ پھل کھڑ جانده
مور روحاں دے پیلاں پاوندے نیں

أَحْكُمُ الْحَاكِمِينَ ذات اوہدی
پال دا اے اوہ سب جہاناں نُوں
اوہدے حکماں دی ہر شے بدھی اے

خالی ٹھوٹھے نُوں رب ای بھر دا اے
 عدموں دیوے وجود شیواں نُوں
 عقلوں فکراں توں بوہت اُچا اے

رُوحاں جساماں دے پنجرے تاڑے
 ہے نَفَخْتُ تھیں جان پادیندا
 زندگی موت سبھ دی ہتھ اوہدے

لیندا ساہ اے جد گلاب دا پُھل
 اللہ اللہ دی تسبی کردا اے
 مہک گھل دی فضا چ جاندی اے

سُن دا کیڑی دے دل دی دھڑکن اے
 پتے اوہدے ای امروں ہل سکدے
 سڑ دے تھل دا اوہ کالجا ٹھارے

ذات وچ کلا صفتاں وچ کلا
 وَحْدَهُ لَا شَرِيكَ خالق ہے
 اوہنے دُنیا وجود وچ آندی

تیبہ مکاوند اے مولا دھرتی دی
 کھنب دیندا اے پنچھیاں تائیں
 رحمتاں جھولیاں چچ پاوند اے

ایہ ہواواں بچ تر دے بدّل وی
تیری رحمت تھیں اوندے جاندے نے
جتھے تُوں چاہویں او تھے ورھدے نے

اگ مٹی ہوا تے پانی نوں
کٹھیاں کیتا اے جس نے قدرت تھیں
حکمتاں والا اے عَزِیز ہے اوہ

میرے دل تے نظر دا محور تُوں
تینوں ای بھالدی اے رُوح میری
تیری رحمت دا مولا طالب ہاں

سانبھ دا آملنے چج بوٹاں نُوں
اُوکڑاں وچ ہے اوہو کم اوند
اپنی مخلوق دے رہوے نیڑے

ذّرے ذّرے دے لب تے ناں اوہدا
حمد اوہدی چج رُجھے تارے نے
ہر شے اوہدی گواہی دیندی اے

حکمتاں اوہدیاں نُوں اوہ جانے
اوہدے کُج دے نشان ہر پاسے
اکھ نُوں اوہ نظر نہیں اوند

سکھنے ٹھوٹھے بچ خیر پا مولا
تیری رحمت دا لوڑ وند ہاں میں
لوڑ دی مینوں تھوڑ نہ آوے

وہم توں مینوں کر نجات عطا
مینوں بخشیں یقین دی دولت
ایسی دولت جو ختم نہ ہووے

قُلْ هُوَ اللَّهُ دی رمز تُوں سمجھو
دل دے وچ غیر نہ رہوے کوئی
فیر وحدت دا نور ملدا اے

صِبْغَةَ اللّٰہِ اِی رَنگ سَوہنَا اے
 جِس تے چڑھ دا اے بھاگاں والا اے
 رَنگ پَکّا اے پھکا پیندا نہیں

اوہ عَزِیز اے رَحِیم ہَادِی اے
 مان رکھ دا اے اپنے بندیاں دا
 اوہ اے تَوَّاب معاف کردیوے

تتلیاں اوہدا جلوہ دیکھن لئی
 گھمدیاں نے دوالے پُھلاں دے
 ذکر اوہدے سچ مست ہُندیاں نے

کوئی گھیرا ناں اوہدا تھاں کوئی
 اوہدے گھیرے چ کائناتاں نے
 عقل ادراک کیہ کرے اوہدا

بحر اوہدے کنارے اوہدے نے
 بیڑیاں اوہ تراون والا اے
 لہراں اوہ دے حکم تھلے نے

اوہ اے قَادِرُ ، قَوِی ، صَمَد اوہ اے
 ہر تھاں اوہ دی حُکمرانی اے
 اوہدا قبضہ اے سب جہاناں تے

بھردا پلے ہے پر جتاوندا نہیں
 کل مخلوق نُوں کھواوندا اے
 نہیں سوالی نُوں موڑ دا خالی

حکم اُدْعُوْنِی اوس کیتا اے
 منگو منگو ناں منگنوں سنگو
 ہر دُعا نُوں قبول کردا اے

اوہدی رحمت غضب تے حاوی اے
 اَرْحَمُ الرَّاحِمِیْنَ اے ذات اوہدی
 لہندی مجرم نوں وی کلاوے وچ

أَحْسَنُ الْخَلِيقِينَ شان اوهدی
جو وی چاوهندا بنائی جاندا اے
اوہدا کُن دا اشارہ کافی اے

وَأَسْتَعِينُوا دا ایہو معنی ایں
اُوکڑاں وچ پُکار لو اوہنوں
اوہ مددگار اوہو حامی ایں

عَم فَضْلًا كَبِيرًا مومن لئی
هَآوِيَةً کافراں دے لئی خلقی
اوہدے حکماں چ مین میکھ نہیں

جیہڑی ٹہنی جڑھوں ہری کردا
 اوہدے اُتے ای پھل کھڑ دے نے
 مہک حمداں دی ونڈ دے جگ نوں

ھو ایں لا ھوٹ اے ٹکانا ترا
 میں گنہ تیری کس طراں جانا
 مینوں مولا سمجھ نہیں اوندی

اکھ دے لئی ویکھناں محال ترا
 اُچی ہستی اے تیری عقلاں توں
 راز تیرا کسے تے گھل دا نہیں

رَبِّ اغْفِرْ لِيْ ہاں سدا دیندا
تُوں عَلِيْمٌ خَبِيْرُ ایں مولا
میرے عیباں تے پردا پادیویں

تیری صنعت گری نوں جد ویکھے
عقلاں والے نے ہار من لیندے
عشق والے دھمال پاوندے نے

میرے درداں دا کر اپا مولا
غم دے طُوفان چوں رہائی دے
تیرے ہاتھوں تے کوئی دردی نہیں

گھڑیاں ، ہفتے مہینے سال اوہدے
 ساری تقویم اوھنے کیتی اے
 جان دا اے حشر دیھاڑے نوں

فانی سب کجھ اے باقی ذات اوھدی
 اوہ عدم نوں وجود دیندا اے
 نقش لیکے تے فر مٹا دیوے

پُھل کلیاں اہ ڈال تے شاخاں
 حُسن اوہدے دی گل کردے نے
 اوہ بجمیل اے بجمال ونڈ دا اے

اوہدے نُوروں ای سارے عالم نے
 ہر شے اندر ظہور اوہدا اے
 اوہدے جلوے نے روشنی دیندے

اوہ اے مولا جہان دا وارث
 دل دے بھیتاں دی وی خبر اوہنوں
 گل نُوں جانے اوہ گل نُوں جان دا اے

ڈُگے بختاں نوں فر اُٹھا دیوے
 ٹھیکری نُوں اوہ سونا کرسکدا
 اوہدے گُن دا اشارا کافی اے

اوہدے اگے چلا کی نہیں چل دی
 حال باطن دا جان دا مالک
 کچھ وی اوہدے توں لکیاں ہو یا نہیں

اوس دی لوڑ کل جہاناں نوں
 اوہدا تا ای سارے کھاندے نے
 گھل دا اے رزق اوہو ہر تھاں تے

بادشاہواں نوں گھٹے رول دے
 پکھئی واساں نوں تخت دے چھڈ دا
 اوہدیاں رمزیاں اوہ ای جان دا اے

اوہنوں عقلاں پچھان نہیں سکیاں
دھونِ ادراک دی وی جھک دی اے
سبھ دی سوچوں گمانوں ہے اُچا

ذّرے وچ رکھیا اوس نے ایٹم
اوہدی قدرت نوں جان نہیں سکدے
لوہیا آسمان توں اُتار دا اے

تھالِ رحمت دے ونڈ دا جگ نوں
نعمتاں بے شمار دیندا اے
اوہدے ہر دم بھرے خزانے نے

اوہ اے مالک نوازے بندیاں نوں
 سجدی اوہے نوں بے نیازی اے
 اوہدے اگے نوا لے دھون اپنی

فَاذْكُرُونِيْ ۖ اَيُّهَا الْمَعْنٰى اِيْنَ
 سبھ نوں بھلیں خُدا نُوں بھلیں ناں
 ذکر دے نال زندگی دل دی

حکم اوہدا اے مَن لے سچیاں نُوں
 جھوٹھیاں نال یاری لاویں ناں
 طوق لعنت دا جھوٹھیاں دے لئی

مَن دے چرخے تے ذکر دی پُونی
 اوندے جاندے جو ساہ تے کت دا اے
 قبر تچ نور اوہدی اُترے گا

حمد کرنا ای کم سچا اے
 رب دی رحمت دے نیڑے لے جاویں
 اوہدا ذاکر کدے وی مردا نہیں

قبر دی روشنی جے چاہنا ایں
 فاذاکرونی تے کر عمل بندیا
 یاد اوہدی کدی بھلاویں ناں

مثل رب دی نہیں کوئی ہوسکدا
سون جاگن توں پاک ذات اوہدی
اوہدی قدرت توں کجھ وی باہر نہیں

لکھے تقدیر دے مٹا دیوے
جو وی چاہوے اوہ فیر لکھ سکدا
اوہدی مرضی بناں تے کجھ وی نہیں

چڑھ دا سُورج اے رب دے حکموں
نُور ونڈ دا اے سبھ زمانے نوں
اوہدے حکموں ہے لہندا لہندے وچ

سارے پُھلاں بچ واشنا اوہدی
 رنگ سارے ای اوہدے نُوروں نے
 جنتاں نوں سجاون والا اے

اُسدی اولاد ناہیں ماپے نے
 ناں اوہ تشبیہاں وچ سماوندا اے
 سوچ ساڈی توں اوہدی شان اُچی

رحمتاں دا شُمار کون کرے
 نعمتاں دا حساب اَوکھا اے
 گنتاں چاہو تے گن نہیں سگدے

نَحْنُ أَقْرَبُ هے دس دا آپے
 فری وی اکھ نوں نظر نہیں آوندا
 جو وی کہندا اے حق ای کہندا اے

لکھتاں اوہدے لکھایاں لکھیاں نے
 جو وی کلکوں صفحے تے آیا اے
 اوہدی رحمت دی روشنی کھلری

سارے اکھراں چ نور اوہدا اے
 اوہدی رحمت تھیں حمد آکھی اے
 سوچ دی اوس تک رسائی نہیں

ہر شے اوہدی اے حمد وچ رُجھی
 ذکر اوہدا اے جاری ہر تھاں تے
 ہر طرف اوہدے نُور دے جلوے

وِرد ہو دا جو پچھلے پہر کرے
 نُور ورھ دا اے اوہدے دل اُتے
 سَکھ دی منزل دے نیڑے ہو جاندا

سوچ دی شاخ اُتے حمد کھڑی
 اُتری کاغذ تے مہک پھیل گئی
 ساہمنے میرے معجزہ ہو یا

اوہ ہے رَحْمَن بخششاں ونڈ دا
مجرماں نوں معافیاں دے کے
جنتاں ناویں لاون والا اے

موہدرے مونہہ اوہ ڈِگت پیندا اے
جیہڑا اوہدی پکڑ چ آجاندا
ہر گھڑی اوہدا رحم منگ دا رہو

یاد اوہدی دا دیوا بالی رکھ
قلب دا نیہرا دُور ہووے گا
وَرَد اللہ ہو اللہ کردا رہو

نیہرے وچ وی اوہ صُورتاں خلقے
 اوہدی قُدرت نوں جان سکدے نہیں
 ہے قلم اوہدا لوح تے چل دا

رب دے درتے جو آن ڈگ دا اے
 اوہنوں رحمت تھیں ہے اُٹھا دیندا
 خوف سارے مُکادوے اوہدے

نام اوہدا سدا پُکاری جا
 ٹالدا اے دُعا تھیں غم سارے
 اوہدا ہندا کرم ودھیرا اے

عرشوں رحمت نزول ہندی اے
 لہندی مومن نوں اپنے گھیرے وچ
 سارے درداں دا ہے اپا ہندا

سکے بیجاں نوں زندگی دیوے
 بھردا کھیتاں نوں نال سٹیاں دے
 رحمتاں رب اے بے بہا کردا

سُن دا مولا اے التجا سبھ دی
 ہے سَمِیعٌ بَصِیْرٌ ، قَادِرٌ اوہ
 رحم بندیاں تے کردا ہر ویلے

اوہدی رحمت دا حد بتاں نہیں
 پالدا اے اوہ گل زمانے نوں
 اپنے مُنکر نوں وی رجاوندا اے

رب گریم ایں رءُوف تے ہادی
 اوہ مُہیّین وی ایں رَشید وی اے
 سانوں قرآن ایہو دس دا اے

دھرتیاں آسمان اوہدے نے
 جوڑا ہر شے دا خلقیا اوہنے
 کُن دا اِظہار ہووے ہر ویلے

نفس اتارہ نُوں جو مار دوے
 اوہدے دل نوں حیاتِ مِلدی اے
 رحمتاں لیندیاں کلاوے وِچ

رب دیاں رحمتاں اوہ لٹ دے نے
 پچھلی راتیں جو لبھدے مالک نوں
 تڑکے تڑکے ای جھولی بھر لیندے

رب دے بُوہے تے جو سدا دیوے
 شے کسے دی ناں رھندی تھوڑا وِہنوں
 نعمتاں رب توں ڈھیر پاوندا اے

گھٹے رُلدے نوں تخت بخش دوے
تار دیندی اے دُبدی بیڑی نوں
اوہدی رحمت دی چل جدوں آوے

شکر اوہدا گزار دے جیہڑے
نعمتاں رب توں ڈھیر لیندے نے
لوڑاں تھوڑاں توں جان چھٹ جاندی

بھاویں دُشمن زمانہ ہو جاوے
وال وِنگا نہیں اوہدا ہوسکدا
جس دے سرتے خُدا دا سایا اے

دل دی تختی تے پُورنے پاواں
 اودھی رحمت کمالِ مِلدی رہوے
 اَللّٰہ اَللّٰہ ای بس میں لکھ دا ہاں

رب دی آساں دے سکھنے ٹھوٹھے وچ
 اپنی رحمت دی خیر پاوندا اے
 اوس توں بوہتا پیار کون کرے